

PROGETU DE LEI DE BOLUNTADI POPULARI

CUNSILLU REGIONALI DE SARDIGNA SA DE XVII LEGISLADURAS

«Proposta de Lei Urbanistica de sa Regioni Autònoma de Sardigna – Normas urbanísticas in cumpridura de s'art. 3, litera “f” de su Statutu Autònomu de Sardigna – Lei Costituzionali n. 3 de su 26 de friàrgiu de su 1948 – Disponimentus normativas urbanísticas chi pertocant a s'aposentamentu de impiantus fotovoltaicus industrialis in terra e èolicus terrestris cun arricidura de principius e òbligus de amparu e valorizatzioni chi ddoi funt in is programmas subranatzionalis, natzionalis e regionalis».

Sa relata

Sa Regioni Autònoma e Speciali de Sardigna , chi dd'ant aprovaau su Statutu cun lei costituzionali n.3 su 26 de friàrgiu de su 1948, disponit de cumpetèntzia primàrgia a pitzu de “Edilitzia e Urbanistica” aici cumenti concordau de s'art.3, litera «f», de su matessi Statutu.

Sa Corti Costituzionali at cunfrimau bortas meda chi sa cumpetèntzia de su legisladori sardu po su chi pertocat s'edilitzia e s'urbanistica no cumprit «sceti is funtzionis de genia urbanistica scheta, ma fintzas cussas chi pertocant a is benis culturalis e ambientalis» (sentèntzia n. 178 de su 2018; in custu

sentidu gai sentèntzia n.51 de su 2006).

Pianus de guvernu de su territoriu

In custu sentidu tocat a ponni craru chi su territoriu chi pertocat sa Regioni Sarda, est interessau de pianus meda de guvernu e arregulamentadura de bessida regionali, natzionali e comunitària chi pertocant s'amparu e sa valorizatzioni de particularidades específicas de su setori ambientali e paesagìsticu sardu. Custus setoris, ogetu de disponimentus gestionalis precìsus de genia stringidora e vincolistica, no ant arriciu mai normas craras de amparu e de valorizatzioni. Sa proposta de Lei chi seus incarrerendi innoi bolit fai omogèneas e orgànicas is

*Furriada in sardo de s'operadora de s'Ufitziu Língua Sarda de Donori – Progetu “Sa Língua Sarda 2” – Unioni de is Comunus de Partiolla e Campidanu de Basciu – TuLIS – Annualidadi 2023

normas urbanísticas cun sa pianificatzioni territoriali chi est gai ogetu de pianus e programmas chi boleus arremonai innoi.

Profetu urbanisticu

Funt ainas de pianificatzioni e amparu chi no ant furriau mai a normas urbanísticas profetosas chi podessint straviai sconciaduras de su territòriu regionali chene possibilidadi deaconciadura, mancasi is disponimentus chi ddoi funt in is programmas de gestioni de is àreas arremonadas. Duncas, no fait prus a abetai e perlongai, e tocat a incarrerai normas urbanísticas bonas po assegurai s'amparu prus mannu chi fait a is logus chi funt a arriscu idrogeològicu, is logus de amparu speciali, is habitat de spratzidura comunitària, is làcanas de parcus e cumpèndius naturalisticus, is benis identidàrius, archeològicus e monumentalis, is Situs de Importu comunitàriu, is àreas de amparu Igp, Doc e Dop chi pertocant a unu tèssiu econòmicu de importu mannu cumenti is produtzionis de messarìtzia e agropastoralis.

Apretu pianificadori

Custa normativa urbanistica pigat genia de apretu pensendi a su perìgulu de sciusciadura manna meda de su territòriu sardu, cun cunseguèntzias lègias e chene possibilidadi deaconciadura in dònna setori territoriali, pofintzas in sa bisura urbanistica sconciada totu de Sardigna e sa farta de sa cumpetèntzia primàrgia de sa Regioni in s'interis de sa pianificatzioni «Urbanistica», in unu echilòbriu territoriali giustu e cuntzertau.

Artìculu 1

Punnas e tareas

Custa Lei, cunforma a sa Lei Costituzionali n. 3 – Statutu de sa Regioni Autònoma de Sardigna – art.3 litera «f» e de is cumandus de s'art.6 de is Normas de Cumpridura de su Statutu Speciali – D.P.R. 22 de maju de su 1975, n.480, tenit cumenti tarea:

1. sa pianificatzioni territoriali e su guvernu de su territòriu sardu po prebenni sa sciusciadura de s'echilòbriu giustu intre logus urbanizaus e su tèssiu territoriali , de is compèndius naturalisticus, àreas postas asuta de amparu e valorizatzioni, logus de amparu speciali, situs de importu comunitàriu e àreas ogetu de pianificatzioni stratègica e econòmica.
2. sa disciplina urbanistica de is àreas ogetu de programmas econòmicus, ambientalis e stratègicus de genia comunitària, statali e regionali.
3. sa regolamentatzioni urbanistica de is traballus chi pertocant progetus de produtzioni de energia rinnovabili de fraigai cun sa tarea de su autoconsumo e bia, imperendi subrafacis fraigadas gai o de fraigai, àreas postas gai asuta de pianificatzioni urbanistica pensendi prusshitotu a is logus de messarìtzia, cummercialis e industrialis.
4. Sa regolamentazioni urbanistica de is traballus in àreas e fàbricus de propiedadi pùblica, is comunidadis energèticas impèllias de is amministratzionis pùblicas, cun

*Furriada in sardo de s'operadora de s'Uffiziul Lìngua Sarda de Donori – Progetu “Sa Lìngua Sarda 2” – Unioni de is Comunus de Partiolla e Campidanu de Basciu – TuLIS – Annualidadi 2023

partecipatzioni eventuali de partner industrialis privaus de scerai fendi unu bandu pùblicu cumenti cumandant is normas vigentis.

Artìculu 2

Pianus comunitàrius, statalis e regionalis

Custa lei bolit ponni asuta de pianificatzioni urbanistica is àreas ogetu de:

1. Vìnculus postus cunforma a is disponimentus vigentis chi ddoi funt in sa seconda parti de su D. Lgs. n. 42 de su 2004 e s.m.i.
2. Decraratzioni de interessu pùblicu mannu, cunforma a s'artìculu 136 de su D. Lgs. n. 42 de su 2004 e s.m.i. o cunforma a is disponimentus vigentis.
3. Amparu cunforma a s'artìculu 142 de su D. Lgs. n. 42 de su 2004 e s.m.i., est a nai benis vinculaus ex lege.
4. Vìnculus postus cunforma a s'artìculu 143, lìtera d) de su D. Lgs. n. 42 de su 2004 e s.m.i., in occasioni de s'aprovatzioni de su Pianu Paesagìsticu Regionali primu sìtiu omogèneu.
5. Funt ogetu de custa lei custus arealis, territòrius, benis identidàrius puru:
 - a) su situ “Su Nuraxi” de Barùmini, lista de s'Asienda mundiali de s'UNESCO;
 - b) is benis archeològicus chi faint parti de sa Civilidadi Prenuràgica e Nuràgica e PostNuràgica, mancai chene tenni ancora sa declaratzioni de interessu archeològicu cun is arealis panoràmicus cumenti da definitzioni

de is àutus stèrrius o de sterri po parti de is òrganus chi ddus depint fai;

- c) is àreas naturalis amparadas fundadas cunforma a sa lei n. 394 de su 1991, postas a intru de s'elencu ufitziali de is àreas naturalis amparadas (parcus e reservas natzionalis);
- d) is àreas naturalis amparadas fundadas cunforma a sa L.R. n. 31/1989 (parcus e reservas regionalis; monumentus naturalis; logus de interessu naturalisticu mannu meda);
- e) is àreas chi ddoi funt seguru genias de animalis postas asuta de amparu de is cunventzionis internatzionalis (Berna, Bonn, Parigi, Washington, Barcellona) e de is direttivas comunitàrias;
- f) is logus umidosus de importu internatzionali, amostadas cunforma a sa cunventzioni de Ramsar (logus umidosus chi ddoi funt in s'elencu prevìdiu de su D.P.R. n. 448/1976);
- g) is àreas a intru de sa Arretza Natura 2000 (SIC e ZPS) e le fàscias de arrespetu insoru;
- h) is Important Bird Areas (IBA);
- i) is àreas de reproduztioni, papòngiu e passu de genias faunísticas amparadas, fintzas is “oasi permanenti di protezione faunistica e cattura” cunforma a sa L.R. n. 23/1998;
- j) is àreas, agatadas cunforma a su Pianu stràlcio vigenti po s'assentu idrogeològicu (PAI), de trastus de pianificatzioni regionali o comunali, a perigulosidadi idràulica manna o manna meda (Hi3 – Hi4) e a perigulosidadi de smuronamentu manna o manna meda

*Furriada in sardu de s'operadora de s'Ufitziu Lìngua Sarda de Donori – Progetu “Sa Lìngua Sarda 2” – Unioni de is Comunus de Partiolla e Campidanu de Basciu – TuLIS – Annualidadi 2023

(Hg3 - Hg4)

- k) is àreas asuta de amparu po arresonis alliongiadas a is costumàntzias agroalimentaris, cun produtzionis de agroalimentaris de calidadi e/o de primori mannu conca a su contestu paesàgisticu-culturali de sartu o de una abilesa manna de impreai su logu, prusshitotu po is àreas chi ddoi funt arremonadas in is decretus statalis Igp, Doc e Dop;
6. Funt ogetu de disciplina urbanística, po su chi pertocant is tareas cunforma a s'art. 1 de custa lei, is àreas chi faint parti de is “zonizzazioni” urbanísticas disciplinadas gai in is trastus urbanísticos comunals, provintzials e regionalis vigentis: zonas A, B, C, D, E, F, G, H;
7. Funt ogetu de disciplina urbanística is àreas chi pertocant cavas, minas serradas, no recuperadas e lassadas o is partis de cavas e minas chi no podint èssiri sfrutadas prus cunforma a s'art. 4 litera «a» de su Statutu autònomu de sa Regioni Sardigna Lei Cost. n. 3 de su 26 de friàrgiu de su 1948;
8. Funt ogetu de disciplina urbanística is àreas chi fuit a intru de is làcanas de polìgonus e basis militaris, chi pertocant a pianus e acàpius cunforma a is commas precedentis de custu artìculu, fitnzas cunforma a s'art. 14 de su Statutu autònomu de sa Regioni Sardigna, Lei Cost. n.3 de su 26 de friàrgiu de su 1948, chi previdit s'entrega a s'asienda regionali de is benis de su Stadu chi apant acabau sa

funtzioni statali originària;

1. Sa Regioni sarda, cunforma a is normativas vigentis, statalis e regionalis, impellit e bolit sa cumpridura de “comunidadis energèticas” de interessamentu comunali, intercomunal, provintziali e regionali.

Artìculu 3

Proibimenti de apoderamentu

1. In is àreas de s'artìculu 2 de custa lei, aforas de is traballus chi pertocant su autoconsumu de fai in fràigus chi esistint gai o chi depint pesai cunforma a is cumandus chi sighint, est proibiu su piatzamentu de impiantus fotovoltaicus industrialis in terra e agrivoltaicus puru;
2. In is àreas arremonadas in s'artìculu 2 de custa lei est proibia sa fraigadura e su piatzamentu de impiantus eòlicus terrestris;
3. In is àreas arremonadas in s'artìculu 2 de custa lei est proibia sa fraigadura e su piatzamentu de impiantus de energia elètrica nous chi pigant de fontis fòssilis
4. In is àreas arremonadas in s'artìculu 2 de custa lei est proibia puru:
 - a) sa fraigadura de impiantus de ammagasinamentu – numenaus “Energy Storage (BESS) – francu cussus chi pertocant s'autoconsumo chi tocat a dd'arregulai cun Diretiva aprovada de sa

*Furriada in sardu de s'operadora de s'Ufitziu Lìngua Sarda de Donori – Progetu “Sa Lìngua Sarda 2” – Unioni de is Comunus de Partiolla e Campidanu de Basciu – TuLIS – Annualidadi 2023

Giunta Regionali proposta de acòrdiu de
is Assessoraus cumpentis e arricia cun
Decretu de su Presidenti de sa Regioni;

- b) su cumprimentu de impiantus de aprodèndiu e alliòngiu eletricu cun impiantus offshore chi s'energia sua no siat prevista de su Pianu Energèticu Regionali de cunformai a intru de 12 mesis de s'arrividura de cesta lei;
- c) su cumprimentu de impiantus de alliòngiu, spratzinadura e stramudiadura elètrica cun arretzas infrastruturalis non previstas de su Pianu Energèticu Regionali e no netzessàrias a gestionai su sistema elètricu sardu inditau de su Pianu Energèticu regionali.

5. Is àreas arremonadas in s'articulu 2 funt marcadas, in su pianu cartogràficu, cunforma a is àuts de arreconnoscimentu cumenti in s'elencu puntuali chi sa Giunta Regionali at a depi sterri e aprovai a intru de 30 diis de candu intrat in balori cesta lei.
6. Is làcanas e is acabiddaduras chi ndi pertocant, a intru de 60 diis de candu intrat a balli cesta lei, tocat chi si pòngiant in sa cartografia e si bèngiant georeferentziadas in su geoportali chi ddi nant “GeoMappe” de sa Regioni Sardigna in sa categoria “àreas urbanisticamenti proibias a su piatzamentu de impiantus eòlicus e fotovoltaicus cunforma a is commas 1, 2

e 3 de custu articulu.

7. Is Comunus, a intru de 180 diis de s'intrada in vigore de cesta lei, depint aconciai is trastus de pianificatzioni insoru a is arrègulas de custu articulu e scioberant, si bolint, s'amanniamentu de is àreas po arresonis cumprovadas cunforma a s'art. 1 de cesta lei.
8. Finsas a su cumprimentu, cunforma a s'articulu 6, po parti de is Comunus, aturant bàlidus is disponimentus e is definitzionis cartogràficas previstas in cesta lei.

Articulu 4

Dèrgas interbènnidas pùblicas

1. Dèrgas eventualis a su probimentu arremonau in su comma 1 de s'articulu 3 podint èssiri permìtias de sa Giunta Regionali sceti:

po impiantus de circa científica e tecnològica, pedius de sugetus pùblicus o sotziedadis a majoria pùblica, fintzas in assòtziu temporàneu de impresa o po mèdiu de partecipatzionis societàrias cun privaus, cun esperièntzia produtiva e tecnològica provada de livellu internatzionali, scioberaus po mèdiu de proceduras a evidentza pùblica, cunforma a is normas vigentis po su chi pertocat arrendus e servìzjus pùblicus, po sa produssidura de idrògeno e s'erèntzia sighidora de energia elètrica

*Furriada in sardu de s'operadora de s'Ufitziu Lìngua Sarda de Donori – Progetu “Sa Lìngua Sarda 2” – Unioni de is Comunus de Partiolla e Campidanu de Basciu – TuLIS – Annualidadi 2023

po mèdiu de centrali tecnologicamenti innoadora frunia cun idrògeno, a pustis de s'averiguada de assogetabilitadi a Valutatzioni de *Impatto Ambientale* de is impiantus pedius.

2. Is impiantus fotovoltàicus, agrivoltàicus e eòlicus chi ddoi funt gai in is àreas interessadas de is disponimentus de cesta lei ant a podi sighiri a traballai finsas a sa balidesa de s'autorizatzioni chi tenint, francu dèrogas eventualis previstas de su Pianu Energèticu Regionali e a pustis de una VAS (*Valutazione Ambientale Strategica*).

Artìculu 5

Comunidadis energèticas

2. Cun sa tarea de cumpriri a su comma 1 sa Giunta Regionali, a intru de 30 diis de candu intrat in vigore cesta lei, cun proposta de is Assessoraus cumpetentis aprovat una Diretiva, chi si depit impreai cun Decretu de su Presidenti de sa Regioni, po concordai is maneras de impèllida, is caminus autorizadoris e is maneras de interbènnidas de is privaus po concordai is comunidadis energèticas.

3. Totus is trèminis de tempus proceduralis de cumpetèntzia regionali chi pertocant is interbènnidas de su comma 1 funt ammesaus.

Artìculu 6

Pianus de energia rennoàbili lineari

1. Cun sa tarea de impelli unu caminu modernu e profetosu de valorizatzioni de s'energia rennoàbili, sa Regioni sarda, cunforma a is art.3 litera «f» e art.4, litera «e», de su Statutu Autònomu de Sardigna, Lei Cost. n. 3 de su 26 de friàrgiu 1948, impellit pianus de produssidura energètica po mèdiu de sa cumpridura de progetus de valorizatzioni de is infrastruturas linearis, cumenti arrugas, ferrovias, pistas ciclabilis e infrastruturas simbillantis.

2. Sa Regioni sarda, de acòrdiu cun is sugetus pùblicus meris e/o concessionàrius de arretzas infrastructuralis linearis cunforma a su comma 1, concordat progetus de valorizatzioni energètica de àreas bixinas e de pertinèntzia de arrugas viàrias, ferroviàrias e ciclabilis, pruschitotu po àreas de mezeria, banchinas e marciapeis.

3. Sa Giunta regionali, a intru de 60 diis de candu intrat in vigore cesta lei, concordat unu pianu chi arreconnoscet is infrastruturas linearis principalis e concordat is proceduras po cumpriri progetus de energia rennoàbili lineari.

4. Cunforma a su comma 3 sa Giunta regionali arreconnoscit maneras de coinvolgimentu de sogetus pùblicus e privaus in sa cumpridura de is progetus cunforma a su comma 1.

*Furriada in sardu de s'operadora de s'Ufitziu Lìngua Sarda de Donori – Progetu “Sa Lìngua Sarda 2” – Unioni de is Comunus de Partiolla e Campidanu de Basciu – TuLIS – Annualidadi 2023

Artìculu 7

Proceduras autorizadoras

1. Totus is procedimentus incarreraus e no serraus in sa dii chi benit in vigore custa lei tocat chi siant castiaus cunforma a is disponimentus de s'art.3 de custa lei, cunforma a sa lei 21 de abrilis 2023, n. 41, art. 47, comma 9ter, chi pertocat s'annuddamentu de is permissus entregaus e sa regolamentadura de is proceduras incarreradas.
2. A sa matessi norma arremonada in su comma1, si depint pensai chene balori totus is permissus entregaus in is àreas cunforma a s'artìculu 3 de custa lei e chi is traballus no apant ancora ocasionau dannus chi no fait a aconciai a su territoriu, cumenti sa artziada de prus de su 30% de is aerogeneradoris o de is pannellus fotovoltaicus e agrivoltàicus

previstus in is progetus.

Artìculu 8

Norma finantziària

1. De sa cumpridura de is disponimentus arremonaus in custa lei no s'ant a occasionai dèpiris nous o prus mannus a pitzu de sa finantza regionali e a sa cumpridura insoru s'at a fai in siàmbitu de is resursas umanas, strumentalis e finantziàrias a disponimentu a legislatzioni vigenti.

Artìculu 9

Intrada in vigore

1. Custa lei intrat in vigore sa dii agoa de sa publicatzioni sua in su Bulletinu Ufitziali de sa Regioni Autònoma de Sardigna.

*Furriada in sardu de s'operadora de s'Ufitziu Lìngua Sarda de Donori – Progetu “Sa Lìngua Sarda 2” – Unioni de is Comunus de Partiolla e Campidanu de Basciu – TuLIS – Annualidadi 2023